

Referat davart plans giagliards e magra participaziun

L'URB ha salvà sia radunanza annuala a Turitg

■ **(anr/vi) Mo paucs commembers èn vegnids la sonda passada a la radunanza annuala da l'Unìun dals Rumantschs da la Bassa (URB). Donn, pertge suentar la part statutarica ha l'electroinschigner Jon Erni tegnì in referat davart plans giagliards.** Erni è creschì si a Scuol e Tschlin ed è manager tar Microsoft Svizra. L'electroinschigner discorra cun fiev e chapescha dad entusiasmar l'auditori. Quai è era necessari. Pertge Erni e ses cumbattants vulan colliar las chasadas da l'Engiadina Bassa cun la rait d'autostrada per datas. Il project, che sa chatta uss en la fasa da concept, sa numna «Mia Engiadina».

En intginas vischnancas dal Vallais han ins gia instradà in sumegliant project. «Mia Engiadina» duai dentant sa splegar independentmain da la Swisscom – la quasimonopolista en questa fatschenta.

Svilup – sco pli baud la viafier

Raits hajan adina giugà ina gronda impurtanza per il svilup da l'Engiadina, ha ditg Erni. L'emprim saja quai stà la rait da vias, suenter quella da la viafier e lura la rait d'energia. Uss dovri in nov pass vers l'avegnir. «La glieud vul avair in atg a la rait da l'autostrada mundiala per datas», di Erni.

El sez abitescha a Thalwil e turna gugent gia la gievgia en l'Engiadina. Il venderdi lavura l'inschigner lura da là anora per sia firma. «I dess anc blers auters che lavuran l'enviern pli gugent là nua ch'i n'ha nagina tschajera. Da quai sun jau persvadi.» Ina colliaziun ferma e segira a la rait da datas purschiss questa pussaivladad. Ina simpla lingia da telefon na bastia en l'avegnir betg pli per la quantitad da datas ch'ins nizzegia.

«Mia Engiadina» prevevia investiziuns da 50 milliuns. Per pudair realisar il project dovri almain 2500 chasadas u clients che giavischan il servetsch, ha Erni calculà a la fin da ses referat.

Dus novs suprastants

En la part statutarica han ils commembers da l'URB elegì *Simon Denoth* e *Gaudentz Cavegn* sco novs suprastants. *Cornelia Livers*, che ha ils ultims onns fatg cassiera, banduna la suprastanza. Denoth surpiglia en l'avegnir la communicaziun e gida a concepir la nova pagina d'internet ch'ins na vul betg pli far ensemen cun la Quarta Lingua. Co che las autras incumbensas vegnian repartidas en suprastanza na saja anc betg cler, ha ditg il president *Jon Carl Tall*.

En ses rapport annual ha il president menziunà ils inscutters interrumentschs

che l'URB organischa regularmain cun persunas prominentas. Gist cun la prelecziun dad *Arno Camenisch* saja quai per exempel reussi da cuntanscher er in publicum pli giuven.

En il quint dal 2014 figureschan entradas da radund 13 100 francs, expensas da 13 800 francs ed ina sperdita da radund 700 francs. La facultad da l'unìun munta a 12 700 francs.

Nagut cun il cumpromiss idioms – rg

Urs Cadruvi ha infurmà la radunanza davart las fatschentas che occupan la Lia Rumantscha. I na saja anc betg cler co ch'ins finanzieschia a lunga vista ils curs da lingua materna per uffants rumantschs a Turitg, ha ditg il secretari da la Lia.

En connex cun il Plan d'instrucziun 21 ha fatg attent Cadruvi ch'il cumpro-

miss ch'ins aveva chattà il 2013 areguard il rumantsch grischun ed ils idioms n'ha ja deplorablament betg pudì vegnir mess enturn en la proposta che la Lia Rumantscha suttamettia proximamain a la regenza.

Gian Guolf Bardola è mort

La radunanza ha era commemorà Gian Guolf Bardola ch'è mort ils 9 da matg en sia segunda patria, il Tessin. Bardola è stà in dals fundatur e l'emprim president da l'URB.

Il proxim inscutter interrumentsch da l'URB ha lieu ils 25 da zercladur a las 19.00 en la Giesserei ad Oerlikon. Sco giasts èn envidads la pledadra da la Lia Rumantscha *Diana Joerg* e la chantadura *Riccarda Vedana*. Ellas derivan omaduas da Domat. Mintgin che ha interess po vegnir.